

**Naalakkersuisut suliffeqarfittut innuttaasunik tapersersortarialinnik  
suliffissaqartitsisunik nalunaarsugaasut pillugit inatsisissatut siunnersuummik  
kingusinnerpaamik UKA2019-mi saqqummeeqqullugit Inatsisartut  
aalajangiiffigisassaattut siunnersuut.**

Inatsisartunut ilaasortaq Peter Olsen, Inuit Ataqatigiit

**Akissuteqaat**

(Inuussutissarsiornermut Nukissiuuteqarnermullu Naalakkersuisoq)

**Siullermeerinnineq**

Naalakkersuisut sinnerlugit Inatsisartunut ilaasortaq Peter Olsen siunnersuuteqarsimaneranut qutsavigissavara.

Naalakkersuisut siunnersuut soqutiginantippaat, suliffeqarfiillu innuttaasunik ikiortarialinnik suliffissaqartitsisut arlaatigut nalunaarsorneqarsinnaanerisa misissorneqarnissaat tunuartiinnarumangilaat, suliffeqarfiit taamaattut suussusilersorumallugit aammalu suliniutit pisortatigoortumillu suleqatiginiarnerat siunnerfeqartikkumallugit.

Taamaattorli Naalakkersuisut isumaqarput sammisaqarfik annertunerusumik paasinarsaaffigisariaqartoq, tassunga ilanngullugit kommuninik, Majoriamik soqutigisaqartullu allat ilanngullugit, suliassaqarfimmi inatsisissamik suliaqartoqarnissaa sioqqullugu.

Inatsisiliornissap peqqissaartumik qulaajarnissaa siunnerfigalugu aammalu soqutigisaqartunik tamanik akulerussinissaq eqqarsaatigalugu naatsorsuutigineqarpoq inatsisissamut siunnersuummik siusinnerpaamik UPA2020-imi saqqummiussisoqarsinnaanissaa.

Taamaattumik Naalakkersuisut inassutigaat, Inatsisartut allannguutissatut siunnersuutip imatut isikkoqartillugu akuersissutigissagaat:

”Inatsisartut aalajangiiffigisassaattut siunnersuut, Naalakkersuisut pisussaaffilernissaannik Inatsisartut inatsisissaattut siunnersuummik suliaqarnissamik, suliffeqarfiit innuttaasunik ikiortarialinnik suliffissaqartitsisartut nalunaarsorneqartarnissaat pillugu, imaluunniit

suliffeqarfiit innuttaasunik ikiortarialinnik suliffissaqartitsisut pillugit nassuiaammik UPA2020-imi saqqummiusseqqullugit.”

Taamatut oqaaseqarlunga siunnersuut Inatsisartunut suliassanngortippara.